

Lö gou žanblon

M'i rotrouv pa mon klé é mon shat i atann amwin déor.

Kinm mon ki-boutèy, si lé pa pré-pré, mi romark pi tro byin sak néna zalantour.

Lèr i avans ; lo žour pa lwin énèt. Nout filoutri noré kapoté si la Line té pa dann in domi klarté.

N'a pwin in nafèr i agas amwin plis k-in zétranzé i farfouy mon trin. É, la Tite Péshrès i vyin fé son tour d-ménaž lo matin lé gabié po déranž la kaz. M'i siport ; kinm èl i armèt pa minm plas, èl lé pa gran min konm sat avansa.

Parlfèt, dopi lot makro d-ranplasan doktèr Vèrnier la rakont marmay, swadizan mon mémwar souvandéfwa i déroz, néna toužour inn dovan la port astèr. La Tite Péshrès i pas in koud-balyé, i fé kui mon boushé manžé onzèr ; in žène žan i grat la kour inn-fwa d-tanzantan. Soman, gard pa koman lé fé ! Fo pa èt tro rogardan.

Tousala pars nadéfwà mi les karo branshé ? Kisa la žamé obli in marmit si d-fé ? An vil, sitèlman koudvan la modérnité, la gar la sort fronn-mèr, la romont koté Prizinik po ar-toune bordmèr. Kisa k'ab alé soupliny sanm Konsèy Minisipal po di Misié Lo Mèr po pèrd la bann ?

Près in sominn mwinn néna in gou zanblon dan la boush. Dopii iéroswar, mon so sanm mon shonbli lé kashièt sou lo li, pangar Žide, mon pli vyé garson, i défann amwin alé rodé. Sanm Danyèl, mon défin mari, nou lavé nout ti-landrwa.

Sanm Danyèl, ariv la sèzon zanblon, nou té sa rode zanblon. Sèzon tamarin, anou-la po rode tamarin. Sèzon ponm-latanié, Danyèl dann pié ; amwin armas lo bann gran fèy po fagot in panyé ousansa balyé-zig. Pwin-n zour nou té pa dann bwa.

Ryink lo gèp Danyèl té sava rode son-tousèl. Dann prômié-tan li la kit anou, souvandéfw mwin té mažine Danyèl lavé parti o gèp. Ki boug pli éré k-li kan li té arvyin sanm son-n ti-fritir.

Zordi-granmatin, la Tite Pèshrès i vyin pa. Lo garson-n kour s'arla ryink aprémidi. An dous san sokous, nout dé Tigri lé paré po nout ti-tourné-viré. Son-mwin, parla dizèr nou s'ar fine artourné.

Mwin sé-d pèz la port èk in shèz, sansa žamé n'i vir bèf.

In sièk mwin té pokor pas par la ravine. Sitantèlman koudvan la modèrnité, lot bor, dann vérzé mang défin Misié Žèrvé ousa marmay té-i s'a žoué pliské té i vèy kabri, astèr ryink la kaz an dir. Avèk Tigri, nou sé-d kontourn shatodo, koul par santýé, romont shomin Mazérié žiska war trwa pié tamarin kot-a-kot é travèrs in gran plato bordé sanm rézin pikar. Minm pa dé viraż pli-dvan, nou bit si in pié zanblon larz konm légliz Mongayar.

Promié dégot solèy po farine si Piton Patates. Lanons in kok i rézonn dann la ravine Patat-a-Diran. D'a tèt pié zanblon, in ponyé Zwazo Linèt po kabar zot répons.

Mwin po ténir in bransh zanblon sanm la min gosh, mon so kalé dann mon zwintir d-bra, mon min drwat paré po kas lo pli gro grap zanblon mwin té žamé vi, lèrk m'i san konm in moun po bat si lo tron pié zanblon. M'i tourn la tèt. In shèz i vol. Mon garson-n kour i vyin si mwin, i anpony mon blouz. Dérièr li, la Tite Péshrès po ialé. Žide, par koté, lé braté sanm in tite fiy na minm tré Danyél. Larm i roul dann son zyé.

Dann zwintir mon bra, mon so zanblon po débat. É alala m'i wa dann zot park dé zwazo inséparab.

Didier **Basque**,
@rakontèr_patatèr